

Յակոբ կաթողիկոս նախանձախնդրութեամբ միջամուխ կ'ըլլայ նաև Գանձասարի կաթողիկոսական Աթոռի գործերուն:

Այսպէս, երբ 1675ին Ջուղայի մէջ կը վախճանի Աղուանից Տէր Պետրոս կաթողիկոսը, և բռնութեամբ իշխանութեան կը տիրանայ Սիմէոն Վարդապետ, և Գանձասարի Աթոռին ինչքերն իր գիւղը փոխադրելով, հոն կը հաստատուի, Յակոբ կաթողիկոս զայն կը բանադրէ, և եպիսկոպոս կը ձեռնադրէ, և կաթողիկոս կ'օծէ ազուանցի Երեմիա Վարդապետը, և զայն կ'առաքէ Գանձասար: Սիմէոն կ'ընդդիմանայ նորօծ կաթողիկոսին և խռովութիւն կը յարուցանէ: Յակոբ Ջուղայեցի՝ Սիմէոնն ու Երեմիան էջմիածին կը կանչէ, և բազմիցս խրատելէ յետոյ, Սիմէոնէն կ'առնէ ձեռագիր մը, որով սա կը հրաժարի կաթողիկոսական գործերէ, այսինքն եպիսկոպոս ձեռնադրելէ և մեռնն օրհնելէ (1677):

Սակայն հակառակ այս պաշտօնական խոստումին, տակաւին կը շարունակուի հակամարտութիւնը երկու կողմերու միջև, նաև Յակոբ կաթողիկոսին մահէն ետք: Ջուղայեցիին յաջորդը՝ Եղիազար կաթողիկոս, երկու կուսակցութեանց ևս զոհացում տալու նպատակաւ, Սիմէոնն ու Երեմիան աթոռակից և համահաւասար կը հռչակէ: Սակայն Սիմէոն կը յամառի ինքնիշխան գործել: Այնուհետև Եղիազար զայն